



24. oktober 2023

UPA2023/50,119

**Qaniginerpaasamik annasaqarsimanerup kingorna aliasunnerup nalaani sulingiffeqarsinnaanerup periarfissaalernissaa pillugu apeqquteqaat aallaavigalugu oqallinnissamik siunnersuut (imm. 50)**

*(Inatsisartunut ilaasortaq Peter Olsen, Inuit Ataqtigiit)*

**Angajoqqaat meeqqaminnik 18-inik inorlugit ukiulinnik annasaqartillugit qaammatit arfinillit angullugit akissarsiaqartinneqarluni aliasuuteqarnermi sulingiffeqarsinnaatitaanissaannut ilumut pisinnaatitaaffinngortissaneripput pillugu oqallisissiatut siunnersuut (imm. 119)**

*(Inatsisartunut Ilaasortaq Nivi Olsen, Demokraatit)*

Oqallinnissamik siunnersuut – imm. 50 aamma 119 ataatsimut ima Siumumit oqaaseqarfigissavagut, siullermillu siunnersuuteqartut oqallinnissamik siunnersuutaanut qularusuppugut.

Qanigisanik annasaqarsimanermit atatillugu aliasunnerup nalaanni illersugaalluni sulingiffeqarsinnaaneq – taamalu pisup qaangerniarnissaanut isumagisassallu naammassiniarnissaanut – illersugaalluni sulingiffeqarsinnaatitaanissaq Siumup isumaqatigaa. Taamak nalaataqarneq imaanaangitsuujuaannarpoq, pisariaqartitsigaluarlunilu atasuinnarmik unikaallaffissaqaranilu ingerlaniinnartussaasimagaanni, pisariaqartitsigaluartunut nalaassap imaanaangereersup pitsaanerulerneranut qaangilertornerunissaanullu iluaqutaanaviangitsoq tamatta takorloorsinnaallugulu paasilluarsinnaagipput qularutiginnilarput.

Taamaattoq Siumut isumaqarpoq, apeqqut taanna sulisitsisup sulisullu akornanni aaqqiissutissarsiorneqartariaqartoq, kattuffiit sulisitsisullu sulinikkut atugassarititaasut pillugit isumaqatiginninniarnernanni qaqitassaq.

Taamaattumik Naalackersuisut akissuteqaataani akissutigineqartoq Siumup isumalluarfigaa. Naalackersuisut akissuteqarnerminni ilaatigut allapput, illuatungeriit – tassa sulisitsisut sulisullu – isumaqatiginninniarnissaminni aliasuuteqarnerup nalaani ulingiffeqarnissaaq pillugu qaqitsisariaqartut.

Oqariartuut Siumup ima paasivaa, pisortat *sulisitsisutut* tulliani isumaqatiginninniarnermi apeqqummi oqaloqatiginnikkusullutik inissisimaniarumaartut.



Taamak oqaaseqarluta oqallinnissamik siunnersuuteqartut, Inuit Ataqatigiinneersoq Peter Olsen aamma Demokratineersoq Nivi Olsen, apeqquummik pingaarutilimmik Inatsisartunut qaqitsinerannut qutsavigaagut.

Najaaraq Møller  
Siumut